

〈華嚴經疏玄談總科 / 第四門・教所被機〉

編按：本科判為美國法界佛教總會/中文網站製作

節自於唐澄觀法師《華嚴經疏》科判之簡略

A4 教所被機（分二）

B1 舉意總標（分二）

C1 躡前起後 第四教所被機者。

夫教因機顯，離機無言；上說義理弘深，未委被何根器？

C2 約法揀定 若明能應者，十身圓音，今直彰所被。

B2 依門別解（分二）

C1 標二門 通有十類，前五揀非器，後五彰所為。

C2 別釋相（分二）

D1 揀非器（分二）

E1 三凡愚（分二）

F1 別明 前中，一、無信非器；以聞生誹謗，墮惡道故。

二、違真非器；依傍此經，以求名利，不淨說法，集邪善故。

下經云：「忘失菩提心，修諸善根，是為魔業。」

三、乖實非器；謂如言取文，超情至理不入心故。

論云：「隨聲取義，有五過失。」

F2 總指 上三皆是凡愚，故下文云：「此經不入餘眾生手。」

E2 二權小 四、狹劣非器；謂一切二乘。出現品云：

「一切二乘，不聞此經，何況受持？」故雖在座，如聾如瞽。

五、守權非器；謂三乘共教諸菩薩等，隨宗所修行布行位，

不信圓融具德之法故。下經云：

「設有菩薩，無量億那由他劫，行六波羅蜜，不聞此經，或時聞已，不信、不解，不順、不入，不得名為真實菩薩故。」

D2 彰所為（分二）

E1 二別示（分二）

F1 正為 後五顯所為中，一、正為；謂是一乘圓機故。

出現品云：「此經不為餘眾生說」，即通指前五；

「唯為乘不思議乘菩薩說」，即正為之機。

謂一運一切運，圓融行位，即深不思議。

又能徧達諸教，即廣不思議。

故文云：「非餘境界之所知，普賢行人方得入等。」

F2 兼為 二、兼為；謂即時雖未悟入，而能信向成種。

如出現品食金剛喻，故地獄天子十地頓超，大海劫火不能為障。

約未悟入，故名為兼。

E2 三牒前（分三）

F1 引為 三、引為；即前權教菩薩，不受圓融之法。

故十地之中，寄位顯勝，借其三乘行布之名，彼謂同於我法。

後因熏習，方信入圓融。

以離此普法無所歸故，權教極果無實事故。

F2 權為 四者、權為，即是二乘；謂既不聞，況於受持？

故諸菩薩，權示聲聞；或在法會而聾盲，彰其絕分；

或示在道而啟悟，知可迴心。

F3 遠為（分四）

G1 立理正明 五、遠為；謂諸凡夫、外道、闍提悉有佛性，

今雖不信，後必當入。

G2 引經證成 故出現品云：「如來智慧大藥王樹，唯除二處不能為作生長利益。所謂二乘墮無為坑，及壞善根非器眾生溺大邪見貪愛之水。然亦於彼，曾無厭捨。」

G3 會釋前文 前三非器是溺邪見，第四非器是墮深坑，故皆揀之。
今四及五，明佛無厭捨故，示而誘之，熏其成種。

G4 明惡是所為（分二）

H1 正明為惡 又彼品中，明不信、毀謗亦種善根。

謂謗雖墮惡道，由聞歷耳，終醒悟故。

又云：「如日亦與生盲作利益故。」

又如大海潛流喻中，明無不具有如來智慧故。

又破塵出經卷喻中，若除妄想，皆見佛智故。

H2 況出圓融 此皆明有自性住性，即是所為。

況法性圓融，感應交徹，無有一法而非所被。